

## Bbaruha gya Paulo Gyakubanza hali Basosolanika Kwanjuura

Bbaruha gigi gyakubanza hali Basosolonika gyahandiikiirwe Paulo, mukwenda wa Yesu Kurisito (1:1), mu bwire buyeicalirengimwo Kolonso. Yaagihandikiiri harabirihomyaka 51 Yesu Kurisito amaari kubyalwa. Bbaruha gigi gikuteekwa kubba gyalingi gya kubanza mu bbaruha zaamwe zenseenya ziyaahandikiiri. Paulo buyaalingi mu lugyendu lwamwe lwakabiri lwa kutebya Makuru Garungi ga Kurisito, yaatandikisiiryeho kitebe kya beikiriza ba Yesu Kurisito mu ruhuga lwa Sosolonika (Bikorwa bya Bakwenda 17:1-10). Kiki kitebe kya beikiriza kyalingi na Bayudaaya banene na Bayonaani banene. Mu Sosolonika yaarugiriyo bwangu habwa Bayudaaya bamweji kumubyokeera (Bikorwa bya Bakwenda 17:5-10).

Paulo yaahandikiiri Basosolonika kubatatiirya na kubeiramwo bibuulyo byabu, na maani maani ha nsonga gya kwira kwa Yesu Kurisito. Paulo yaananukisiirye Basosolonika nti babwo banyakukwa nibakwikiririza mu Kurisito, boodede Kurisito akwiza kubatwala; kandi de nti, boobo balibanza kwingira mu bwomi butamalikaho (4:16).

Kandi de yaabahandikiiri kubatatiirya mu kwikiriza kwa bu ha bintu bya musinge gwa nzikiriza gya Kurisito. Bukwenda bwa bbaruha gigi bwicala bwa kuhuumuulya na kwiryamwo maani beikiriza ba Kurisito bali mu kurumbwa, aleke beege nti Ruhanga ali hamweji nabo; kandi de nti mu kumaliira bakwiza kusingura.

Bicweka Bihandu bya mu Bbaruha gigi nka Kubihonderegeeni

- (i) Paulo naaramukya kandi naasiima Ruhanga habwa Basosolonika 1
- (ii) Paulo naabaza ha buheereza bwamwe bwa Sosolonika na ha makuru ga Timiteo gaayaamuleeteeri 2–3
- (iii) Paulo naalamba beikiriza ha mulingo gwa kwicaliramwo nibakulindiira kwira kwa Kurisito 4:1–5:15
- (iv) Kulamba kwa kumaliirira 5:16-28

### *Biramukyo Kuruga hali Paulo*

<sup>1</sup> Gyagya Paulo, hamwenya na Silivaano, na Timiteo. Tubahandiikiiri bbaruha gigi, nywe kitebe kya beikiriza ba Yesu ba mu rubuga lwa Sosolonika, beikiririza mu Ruhanga, Bbaa weetu kandi, mu Mukama weetu Yesu Kurisito.

Ruhanga abahe mbabazi zaamwe, kandi, abahe kwicala kurungi na businge.

### *Paulo Naasiima Kitebe kya Beikiriza ba mu Sosolonika*

<sup>2</sup> Biro byensei butubba nitukusaba Ruhanga, tubasabira mbe, kandi nitutahona na kumusiima habwenyu.

<sup>3</sup> Kubba, twizuka mbe bikorwa bya kwikiriza kwenyu kumweikiririizemwo, hamwei na kutaho mutima kukora milimo mya Yesu Kurisito na bihika, kandi, hamwei na kubba basigiku mu kunihira kumwicala nakwo mu Mukama weetu Yesu Kurisito.

<sup>4</sup> Beira bange, nywe ba Ruhanga bayendya, tukyegiri Ruhanga nka kuyaabatongoiri yaabafoora bantu baamwe.

<sup>5</sup> Habwakubba, Makuru Garungi gakukwatagana na Yesu Kurisito gatwabatebeerye, gatakabbe ga bigambu kwankeenya; beitu, gaali gawa maani, maani ga Mwozo wa Ruhanga. Kandi, mwaweeni kwo bibyo bigambu, nibili

bya mananu. Kandi de, mukyegiri, nka kutwabakoleeri mu bigambu bitwabawereeri. <sup>6</sup> Kandi, mu biyo bigambu bitwabatebeerye, Mwozo wa Ruhanga yaabaheeri kusemererwa kunene, nabumwabba mwali nimukuwona-wona. Mu ngeru gogyo yatyo, mwadoori kutuhondera na kuhondera ngesu za Mukama weetu Yesu Kurisito. <sup>7</sup> Kandi, mu ngeru gyogyo gimwei, mwafookiri kyakuwoneraho, hali beikiriza bensei ba Yesu ba mu bicweka bya Makedooni na by'Akaaya. <sup>8</sup> Kandi, mwasaniirye hensei bigambu bya Ruhanga. Mutakabisasaanie mu Makedooni hasa, beitu na mu kicweka ky'Akaaya. Kwikiriza kwenyu mu Ruhanga kudoori ha kwegebwa hantu henseenya. Nahabwakikyo, tuweeni kitakwetaagisya, twe kubaza ha kwikiriza kwenyu kukwo. <sup>9</sup> Kandi de, bantu ba mu biyo bicweka byensei baatuhanuliiri mulingo gumwatutangiriirimwo, na mulingo gumwalekiriho kuramya bisisani, mwatandika kuramya na kukoora Ruhanga, Ruhanga yogwo wa mananu, kandi mwomi. <sup>10</sup> Kandi de, baatuweereeri nka kumukulindiira Mwana wa Ruhanga kuruga mwiguru, yogwo giyaahimboori kuruga mu bakuu. Yooyo Yesu alitujuna hali kiniga kya Ruhanga kikugyenda kwiza.

## 2

### *Paulo Naabaza ku Mulimo Gubaakoori mu Sosolonika*

<sup>1</sup> Beira beetu nka kumukyegiri, lubungo lwetu lutwababungiiri, lutakabbe lwa busa. <sup>2</sup> Butwali tutakadoori kukwo Sosolonika hali nywe, bantu ba mu nsi gya Filipi, baatuwonawoneseerye, kandi de, baatujooa. Kyonkei, Ruhanga weetu mu mbabazi zaamwe, yaatuheeri maani twabatebeerya Makuru Gaamwe Garungi, nabuhabba haalingiho banyanzigwa beetu, banyakubba nibakwendya kutulemesya.

<sup>3</sup> Bigambu byensej bitwabatebeerye, byali kwahi bigambu bya hūgobyā, rundi biwa bigyendeerwa bya bwenzi, rundi bya kubadyaho bintu byenyu. <sup>4</sup> Beitu kandi, Ruhanga yooyo yankei, munyakutusijima, tutebye Makuru Garungi gakukwatagana na Yesu Kurisito. Yooyo yankei, munyakutwesiga yaatukwatya gugu mulimo. Nahabwakikyo, twe bigyendeerwa byetu, tibili bya kukora bintu bya bantu bibakwendya, beitu bintu bya Ruhanga byakwendya. Habwakubba Ruhanga yankei, yooyo awona mitima myetu. <sup>5</sup> Kandi, tihalohoonā kiro kyensej, nka kumwegiri, kitwabaweereerimwo bigambu bya kubakiina aleke mutwendye, kadi rundi bya kwefoorabwefoori beesigwa, mwa kwendya kubatoolahoonā bintu byenyu. Kubba Ruhanga yooyo, keiso weetū. <sup>6</sup> Kandi twe, tukutoolya kwahi bitijinisa kuruga mu bantu, kadi kibbe kuruga muli nywe nywankei, rundi mu bantu bandi. Kakibbe nti, nka bakwenda ba Kurisito, twali ba hūgabe kubaweera mutufeeho, <sup>7</sup> twacwirimwo kubakwata mpula, nka mukali mubyeru kwafaaho baana baamwe. <sup>8</sup> Mukyege nti, twe twabendeerye hoi. Twabatebeerye Makuru Garungi ga Ruhanga, twataho na kuwona nti, tukoori kintu kyensej kikusoboka, twahayo na bwomi bwetu. Malī kwo, mwali banywani beetū ba ku mutima.

<sup>9</sup> Beikiriza beira bange, mwizuke, nka kutwekam-bengi kukora na maani ijolo na mwinsi, tutakwendya kubafokera kizihu, kya nywe kutuha byetaagu byetu, butwali nitukubatebeerya Makuru Garungi ga Ruhanga. <sup>10</sup> Kale nu nywe, muli bakeiso beetū, na Ruhanga de niyeege, ba ngesu zeetū kubba nizili zirungi, bakora bintu birungi, kandi bataali na kakuu kensej, mu ngeru gitweicalirengemwo nanywe, nywe nka bantu bakwikiririza mu Yesu Kurisito. <sup>11</sup> Kindi, nka kumukwega mudulu mubyeru yensej, akwikiririza mu Ruhanga kwawoneera

baana baamwe, natwe kwokwo tweicalengi na ħuli omwei, ħutwali nitucaali nanywe. Twabalambengi, nitubahuu-muulya, kandi nitubekambisya, <sup>12</sup> mwicala nimuli bantu beesigwa hali Ruhanga. Kubba Ruhanga yogwo, yooyo yaabeetiri, yaabafoora bantu baamwe, aleke muwoneho ku kitiinisa kyamwe.

<sup>13</sup> Kandi, tusiima Ruhanga ħuli kiro, haħwakubba ħumwegwiri ħutumwa ħwamwe ħutwabatebeerye, mwaħwikiriize nka ħutumwa ħwa mananu, hatali kukoba nti, byali bigambu byetu bya ħuntu ħuntu. Kandi, mwabiikiriize kwo, nka bigambu bya Ruhanga, haħwakubba na deeru lili, byobyoby bili bigambu bikujuna ħwomi ħwenyu, nywe beikiririza mu Yesu Kurisito. <sup>14</sup> Mu ngesu zeenyu nywe beira beetu, mweiseeni nka kitebe kya beikiriza ba Yesu, Mutongoole wa Ruhanga, ba mu ħuyudaaya. Kubba, nabodede nka kubawonaweeni mu Bayudaaya, nanywedede kwokwo banyansi beira beenyu babawonawoneseerye. <sup>15</sup> Kandi boobo, banyakwita Mukama weetu Yesu Kurisito na baraguri ba Ruhanga, baataho na kutubinga tubarugeho. Baħwo bantu bajooga Ruhanga, kandi, beicala banyanzigwa ba bantu bensei. <sup>16</sup> Mu ngeru gigyo, bali mu kutugaana, tutatebeerya Banyamahanga bigambu bya Ruhanga, bikusobora kubaha kujunwa. Kwokwo yatyo, bali mu kweletera musangu gundi ku gundi. Beitu hataati, Ruhanga mu kiniga kyamwe kinene, amaliriiri kubafubira, haħwa bibii byaħu.

### *Paulo Niyeegomba Kugyenda hali Basosolonika*

<sup>17</sup> Beira beetu, kakibbe nti, tumaari kasumi kadooli tutakuwonagana meiso na meiso, beitu kandi twe, mu biteekerezu byetu tubbanga hamwei nanywe. Kubba twe, mu mitima myetu, tukwendeerya kimwei kwiza

kubawonaho meiso na meiso, kandi tulwanisiirye de hoj, kwiza. <sup>18</sup> Kale nu twe, tukwegomba hoj kwiza hali nywe, na maani maani gya, Paulo. Ngereerye mirundi na mirundi kwiza, beitu Sitaani, munyanzigwa wa Ruhanga, yaatugeeni. <sup>19</sup> Beitu nabwo, nywenywe babwo, batunamwo kunihira, kandi, bakutuha kusemererwa. Nywenywe de, batukwiza kwesugusya nka kitembu kya busingi, twensei butulyemeera hamwei mu meiso ga Mukama weetu Yesu Kurisito, ha kwiza kwamwe. <sup>20</sup> Mu mananu kwo, nywenywe de, mukutuha kitinisa na kusemererwa.

### 3

#### *Paulo Naatuma Timiteo mu Sosolonika*

<sup>1</sup> Heinyuma gya kwicala tutakwegwa kintu kyensei kikubafaaho, twe babiri twacwirimwo, twasigala mu rubuga lw'Ateeni. <sup>2</sup> Twabatumiiri Timiteo, mwira weetu kandi mukwenda wa Ruhanga mu kusaasaanja Makuru Garungi. Nsonga gitwamutumiiri gyal nti, eize abatatiirye, kibahe kwemeera na maani mu kwikiririza mu Yesu Kurisito, <sup>3</sup> aleke kuwonawona kukugyenda kwiza mu meiso, kubaagye nimuli batatiro mitima. Habwakubba, bujune nka bubwo, bwobwo Ruhanga yaatutekaniriize twe, bantu beikiririza mu Yesu. <sup>4</sup> Kubba mu biro byeinyuma, twabaweereeri nka kutukwiza kuwonawona hoj. Kandi, kwokwo de, kibbeer nka kumwegiri. <sup>5</sup> Nahabwakikyo, bunyaaweeni ntakusobora kwicala ntakwegwa bintu bikubafaaho, kwokwo kubatumira Timiteo, eize yeetegereze nka kumwemereeri mu kwikiririza mu Mukama weetu, Yesu Kurisito. Habwakubba nyatiinengi Sitaani, munyanzigwa wa Ruhanga atabbanga abooheerye kusuula mananu ga

bigambu bya Ruhanga na bintu byensej bitwabakoleeri, nibikamaliira bikwiri busa.

*Timiteo Naaleeta Makuru Garungi Kuruga Sosolonika*

<sup>6</sup> Hatı nu, Timiteo nka kwamaari kuruga kukwo hali nywe, eiriri na makuru garungi gakukoba nti, mucaali bantu batatiro mu kwikiriza mu Ruhanga kandi bakwendyagana nka beikiriza. Kindi +yaatuweereeri naakoba nti, bintu byensej bitwabakoleeri mucakabizuka mbe. Kandi de +yaakobiri nti, mukwendeerya kimwei kwiza kutuwonahoon, nka twe kutubanga nitwendeerya kimwei kwiza kubawonaho. <sup>7</sup> Nahawakikyo, beira beetu nywe, kakibbe nti, tubanga nituwonawona, kandi turumbiirwe banyanzigwa, twe tusemereerwe hoj kwegwa bintu bikubafaaho. Kituheeri kusemererwa, kyokyo kya kwegwa bigambu bya maani bikukwatagana na nzikiriza gyenyu mu Yesu Kurisito. <sup>8</sup> Hawakubba mukwetj kigambu kya Ruhanga na maani, natwe mitima myetu mihuumuuri. <sup>9</sup> Kwegwa nka kutuli na kusemererwa kunene hawenyu, mu meiso ga Ruhanga, tituli na mulingo, gutukusobora kumusijimirawona kikumala. <sup>10</sup> Nahawakikyo, kyokyo tukwicalanga nitusaba Ruhanga, ijolo na mwinsi, tusobore kwiza kukwo kubawonahoon na kubatiriya mu bigambu byamwe, aleke mutabba na kikuburwamwo.

<sup>11</sup> Nahawakikyo, tukusaba Ruhanga Bbaa weetu, na Mukama weetu Yesu Kurisito, kutwebembera mu lulwo luyendu lwetu lwa kwiza kukwo hali nywe. <sup>12</sup> Kandi, tukusaba Mukama weetu Yesu Kurisito, abahe nywe bamwikirizamwo, kwendyagana hoj nka beikiriza mu Kurisito, na kwendya bantu bandi, nka twe kutubendya. <sup>13</sup> Mu ngeru gigyo yatyo, tukusaba Mukama weetu, abatiriye mitima, aleke Yesu Kurisito bwaliiza na bantu

baamwe benseenya basyanu mitima, abaagye mutali na kakuu kenseenya mu meiso ga Ruhanga kandi, nimukwomeera habwamwe yankei.

## 4

*Beikiriza ba Yesu nka Kubakusemeera Kwicala*

<sup>1</sup> Kigambu kitukusembesyayo, beikiriza beira beetu, tukubapompogeerya nti, pe beiraba, mwehale kukora bikorwa bibi bya Ruhanga byatendya, nka kumubanga nimukora. Kyonkei hataati, tukubasaba na maani gensei, mwibara lya Mukama weetu Yesu Kurisito, kukora na maani ho na kukiraho. <sup>2</sup> Kubba, mwegiri biragirowe bitwabeegeseerye, mwibara lya Mukama weetu Yesu Kurisito. <sup>3</sup> Ruhanga akwendya mwomeere habwamwe yankei, makuru gaakyo nti, mwehale bwenzi, <sup>4</sup> kandi de nti, huli muntu yeege kufuga mubiri gwamwe, nikili nka kikorwa kya kitiinisa mu meiso ga Ruhanga, na kwomeera habwamwe yankei. <sup>5</sup> Timukusemeera kwicala nimwegombagomba, nka bantu bateikiririza mu Ruhanga, batamutamwo kitiinisa. <sup>6</sup> Kandi kwegomba kukwisana yatyo, otalikukora mwira waamu, rundi kugyendera mukali waamwe, habwakubba, Ruhanga alifubira bantu bensei, bakora bintu byensei bikwisana yatyo, nka kutwabapompogeerye mu kubanza. <sup>7</sup> Kubba, Ruhanga atwetiri kwahi kwicala mu bibi, kyonkei akutweta tubbe bantu bakwomeera habwamwe yankei. <sup>8</sup> Nahabwakikyo, yogwo yensei akusuula kwegesebwa, akubba ataswiri bigambu bya bantu, beitu akubba ajeemeeri Ruhanga yogwo, munyakutuha Mwozo Waamwe.

<sup>9</sup> Ha bintu bikukwatagana na kwendyangana nka beikiririza mu Kurisito, tikisemereeri muntu wondi yensei kubibahandiikira habwakubba, Ruhanga yooyo yankei



yaabeegeseerye mulingo gumukusemeera kwendyan-gananga. <sup>10</sup> Kandi, kili kya mananu nti, beira beenyu beikiriza ba mwisaza Iya Makedooni, mubbanga nimubendya kwo. Beitu beira bange, nkwendya kudasaba nti, mwendyengenenge na kukiraho nka kumubbanga nimukora. <sup>11</sup> Nka beikiriza ba Yesu kubakusemeera kubba, muli na kuwona nti, muteeriho mutima kwicala na businge na beira beenyu, muleke kwezingiirya mu bintu bitali byenyu, huli muntu yeege kukora milimo na ngalu zaamwe, nka kutwalingi tubawereriho. <sup>12</sup> Mu kukora bityo bintu, mukwiza kutunga kitinisa mu bantu bateikiririza mu Mukama weetu Yesu Kurisito, kandi kibahe kusobora kwezemeereeryaho nywankei, mutakwesiga bintu bya bandi.

### *Kwiza kwa Yesu kwa Kabiri*

<sup>13</sup> Beira bange, twe tukwendya kwahi mwicala nka bantu batali na kibegiri, ha bintu bikukwatagana na bahwo beikiriza ba Yesu beira beetu, banyakukwa. Tukwendya kwahi mubbe na nganye nka bantu bateikiririza mu Mukama weetu, bahwo batagira kunihira, mu bwomi bwa biro na biro. <sup>14</sup> Twe, beikiriza ba Yesu Kurisito, tukyegiri nti, Yesu baamwitiri, kandi yaahimbookiri kuruga mu bakuu. Nahawakikyo tkyegeeri kimwei nti, Ruhanga akwiza kutwala Yesu, hamwenya na beikiriza baamwe banyakukwa, mwiguru. <sup>15</sup> Bigambu bitukubaweera hataati, bili bigambu bya Mukama weetu Yesu Kurisito biyaatwegeseerye. Twe bantu beikiririza mu Yesu Kurisito, bali boomi deeru lili, tukwiza kwahi kugyenda mwiguru, beikiriza beira beetu banyakukwera mu Yesu Kurisito, batakagyendiiri. <sup>16</sup> Mukama weetu yooyo yankei, alisirimuka kuruga mwiguru. Bwaliiza,

bibi byobyoy bintu bilibbaho mwiguru: Ruhanga aliduumira neiraka lya hakyendi, lugwara lwa Ruhanga luliikutwa, kandi, muhandu wa bamalayika ba Ruhanga, aliranga butumwa bwa Ruhanga. Heinyuma, bantu bensei banyakukwa nibakwikiririza mu Yesu Kurisito, boobo balibanza kuhimbooka. <sup>17</sup> Kasi mwomwo, twe bacaali boomi, kandi de, bakwiza kubba basigeeri inyuma mu nsi, balitusenga ha murundi gumwei, na bawo beira beetu mu bikaka, nibatutwala mu mwanya, kuromba Mukama weetu Yesu Kurisito. Heinyuma gya kututwala, tukwiza kugyenda kwicala nayo mwiguru, biro byensei. <sup>18</sup> Nahawakikyo, na bibi bigambu byakwegesebwa, mutatiiryengenenge mitima.

## 5

### *Mwetegekere Kwiza kwa Mukama Weetu*

<sup>1</sup> Beira bange, tihaloho kintu kyenseenya kimuteegiri, kinkusemeera kubamanyisya ha bintu bikukwatagana na busumi, rundi kiro, kya Mukama weetu aliiziramwo kuruga mwiguru. <sup>2</sup> Hawwakubba mukyegiri nti, kikyo kiro kya Mukama weetu aliizirimwo, aliiza bwangu nka mwibi kweiza ijolo, atabanziri kuraga. <sup>3</sup> Kubba hali bantu balibba nibakuteekereza nti, bali kurungi kandi bali na businge, bubw hoo ho bintu bilihenekera bwangu, nka bisa bya mukali wa nda kubijiza bwangu ateegiri. Kandi, tihaloho muntu yensei mu bawo bantu alikena kikyo kifubiro kya Ruhanga.

<sup>4</sup> Beitu kandi nywe, beira bange, muleke kwicala nka bawo bantu bali mu ntiti, bawo beicala mu bibiibi na mu buteega. Nahawakikyo, kiro kya kwiza kwa Mukama weetu kitalibaagya muteetekaniize, nka mwibi hweiza ijolo. <sup>5</sup> Kubba, nywe nywenseenya, muli beikiriza ba Yesu, bawo banyakubyalwa kyererezi, mwabba baana

bakora bintu hasyanu, mwinsi rubona. Beitu twe, twicala kwahi baana banyakubyalwa ntiti, bakora bintu ijolo, mu kyebisiire. <sup>6</sup> Nahawakikyo, tuleke kubba nka bantu bebakiri, bawo badoma kandi batakwerinda, beitu kandi, tubbe bakengebu kandi bakwerinda. <sup>7</sup> Kubba, bawo bantu beebbaka, beebbaka ijolo; mu mulingo gwogwo gumwei, na bawo batamiira, batamiira ijolo. <sup>8</sup> Beitu twe nka kutuli baana ba kyererezi, bakora bintu hasyanu, twicala bantu bakwerinda. Nka musurukali yensei kwalwala ngabu musalaka aleke gimulinde, natwedede tukusemeera kulinda bwomi bwetu mu Kurisito, nitukwesiga Ruhanga, kandi nitumwendyanga. Kwokwo natwedede, tukusemeera kukwata na maani kunihira kwa kujunwa kwetu mu Kurisito, nka musurukali kwalwala kintu kya kumulinda mutwe. <sup>9</sup> Kubba Ruhanga, atakatukome kutufubira hawa kiniga kiyaalingi nakyu hawa bibiibi bya bantu; beitu kandi, yaatukomiri kutujuna, kuraba mu Mukama weetu Yesu Kurisito. <sup>10</sup> Yesu Kurisito yogwo, yaakwiri ha musalaba hawetu; aleke mu kukwa kwamwe, twe boomi, rundi bakuu, tusobore kwicala nayo mu bwomi bwa biro na biro. <sup>11</sup> Nahawakikyo, mutatiryengene, kandi mwekambisyengene mu kwikiririza mu Yesu Kurisito, nka kumukukoranga.

*Kulamba kwa Paulo kwa Kumaliira*

<sup>12</sup> Hati nu beira bange, tukubasaba nti, mutengemwo kitiinisa bahandu beenyu, babakoramwo mulimo gunyamaani, bali na busobozi hali nywe mu Mukama weetu Yesu Kurisito; kandi, bawo babeegesya kukora bintu birungi. <sup>13</sup> Mubatwalenge kubba bantu ba bitiinisa hoi, nimubendya. Hawakubba, bakora milimo minyamaani mya kubawoneera. Mwicalenge kurungi na huli omwei, mu businge.

<sup>14</sup> Beira bange, tukubasaba mupompogeerye bantu bensei bagarei, batunge milimo mya kukora. Bawo bali na butiini mu mitima myabu, mubatatiiryenge mu Mukama weetu Yesu Kurisito, na baceke mu milingo myensei mubasagike. Kandi, bantu bensei, mubakwatenge mpula mpula na kugumisiriza. <sup>15</sup> Muteikiriza muntu yensei kuhoora nzigo. Beitu biro byensei, huli muntu atengeho mutima, kukoora mwira waamwe mu Mukama weetu Yesu Kurisito kintu kirungi, na kukoora bantu bandi bensei.

<sup>16</sup> Mwicalenge musemereerwe mu mitima myenyu biro byensei, <sup>17</sup> kandi, nimusabanga Ruhanga, mutakulekeera. <sup>18</sup> Mumusiimenge mu bintu byensei, habwakubba kukwo kwokwo kwendya kwa Ruhanga hali nywe mu Yesu, Mutongoole wa Ruhanga.

<sup>19</sup> Beitu, mutalisuula kintu kyensei kirugiri hali Mwozo wa Ruhanga, <sup>20</sup> kandi, mutaligayanga bigambu bya muraguri wa Ruhanga. <sup>21</sup> Bigambu byensei bimwakeegwanga, mubanzenge nimubilinganja kurungi. Kikyo kyensei kirungi, mukikwatenge, nimukita mu mitima myenyu. <sup>22</sup> Kandi, mwehalenge bintu byensei bibiibi.

### *Paulo Naaraga Beikiriza ba mu Sosolonika*

<sup>23</sup> Tukasaba Ruhanga, yogwo aleetaho businge mu bantu, abahe mitima misyanu mu bintu byenseenya. Kandi de, tukumusaba, alinde myozo myenyu, na mibiri myenyu, aleke nywensei mwicale mbura kakuu kensei, ha kwiza kwa Mukama weetu Yesu Kurisito. <sup>24</sup> Ruhanga yogwo atweta naatufoora bantu baamwe, eicala mwe-sigwa; nahabwakikyo, akwiza kudoosereerya bibyo bintu byensei.

<sup>25</sup> Beikiriza beira beetu, natwe mutusabire hali Ruhanga.

<sup>26</sup> Beira beetu bensej beikiririza mu Yesu Kurisito, mu-baturamukiirye na kusemererwa kunene hoj mu mitima myenyu. <sup>27</sup> Nkubapompogeerya mu meiso ga Ruhanga, muwone nti, gigi bbaruha gisomeerwe hali bitebe bya beikiriza ba Yesu bensej ba mu Sosolonika.

<sup>28</sup> Katubasabire, Mukama weetu Yesu Kurisito abagi-irenge mbabazi biro byensej bya bwomi bwenyu.

## Ndagaanu Gihyaka

Gungu: Ndagaanu Gihyaka New Testament

copyright © 2017 Wycliffe Bible Translators, Inc.

Language: Gungu

Contributor: Wycliffe Bible Translators, Inc.

All rights reserved.

2020-11-17

---

PDF generated using Haiola and XeLaTeX on 14 Jun 2022 from source files dated 13 Jun 2022

b2d1b010-ce36-53f8-94bb-ea31f34239cc